

Бірлік түбі – БЕРЕКЕ

ЗАН

ZANMEDIA.KZ

✉ zangazer@mail.ru

№32 (3760)
2 мамыр 2025



газеті

Қоғамдық-саяси, құқықтық газет

ЛЕБІЗ

ТАТУЛЫҚ – ТАБЫСТЫ ДАМУДЫҢ КЕПІЛІ

Құрметті әріптестер, оқырман-дар!

Қазақстан Республикасының Судьялар одағының атынан баршаңызды 1 Мамыр – Қазақстан халықтарының бірлігі күнімен құттықтаймын!

Бұл мереке – бейбітшілік пен ынтымақтың, достық пен өзара құрметтің айқын көрінісін көрсететін ерекше күн. Бірлік күні – әртүрлі ұлттар мен ұлыстардың ортақ мақсат жолында ұйысқан ынтымағының белгісі. Қазақстан – сан алуан мәдениеттер мен дәстүрлердің тоғысқан мекенінің жарқын символы. Ел ішіндегі татулық пен келісім – мемлекеттілігіміздің берік іргетасы болып табылады.

Қазақстанда 1 Мамыр мерекесі 1996 жылдан бастап ресми түрде аталып өтуде. Дәл сол уақыттан бері Қазақстан ұлтаралық және конфессияаралық келісімнің бірегей үлгісін қалыптастырды. Осы бағытта Мемлекет басшысы Қасым-Жомарт Тоқаевтың бастамасымен елімізде қоғамдық келісімді нығайту мен ұлтаралық татулықты сақтау бағытында жаңа серпінді реформалар жүзеге асырылуда. Президентіміз ұсынған «Әділетті Қазақстан» тұжырымдамасы – бірлік пен тұрақтылықты одан әрі күшейтуге арналған нақты бағдарды көрсетеді. Әділеттілік пен теңдік қағидаттарына негізделген бұл саясат қоғамдағы өзара түсіністікті күшейтіп, Қазақстанның тұрақты дамуына сенімді негіз болып отыр.

Бүгінгі таңда Бірлік күні – әрбір азаматтың жүрегінен орын алған қасиетті мерекеге айналды. Бірлігі жарасқан елдің болашағы баянды болары анық. Біздің қоғамдағы азаматтардың мәдениеті, тілі мен діні әртүрлі болғанымен, ортақ Отан ұғымында біріккен ұлы ұжым. Әрбір ұлт өкілі өз құндылығын сақтай отырып, Қазақстанның өркендеуіне үлес қосып келеді. Бұл – халқымыздың парасаттылығының, мемлекеттің көрген саясатының жемісі.

Тәуелсіздік жылдарында Қазақстан бірлік пен татулықтың арқасында көптеген жетістіктерге қол жеткізді. Экономикалық өсім, халықаралық аренадағы беделдің артуы, қоғамдық тұрақтылық – осының бәрі ел ішіндегі өзара қолдау мен түсіністіктің нәтижесі.

(Жалғасы 2-бетте)

БҮГІНГІНІҢ БАС ТАҚЫРЫБЫ

ЫНТЫМАҚТЫ ЕЛДІҢ ЫРЫСЫ МОЛ



Бірлік түбі – тірлік. Өзара сенім мен ынтымақтастық жоқ жерде қарсылық пен түсініспеушілік туындайды. Қазіргі сын-қатерлерді тек татулық, ортақ мүддедегі ауызбіршілікпен ғана еңсеріп, елдік мұраттарға жете аламыз. Өзара біте қайнасқан әлемде ғаламдық мәселелерді шешудің бұдан басқа жолы жоқ.

(Жалғасы 3-бетте)

КЕҢЕС

ЖОҒАРҒЫ СОТ АЛҒАШҚЫ ТОҚСАНДАҒЫ ЖҰМЫСЫН ҚОРЫТЫНДЫЛАДЫ

Жоғарғы Соттың төрағасы Асламбек Мерғалиев өткен I тоқсандағы сот төрелігін жүзеге асыру жұмыстарының қорытындылары бойынша республика судьялар корпусының қатысуымен кеңес өткізді.

Кеңес жұмысына Жоғарғы Соттың сот алқаларының төрағалары Нұрсерік Шәріпов, Назгүл Рахметуллина және Аслан Түкиев, сондай-ақ Сот әкімшілігінің басшысы Найль Ахметзакиров қатысты. Облыстық және оларға теңестірілген соттардың басшылары іс-шараға бейне-конференц байланыс (БКБ) арқылы қосылды.

Үкім дәлелдер жиынтығына негізделуі керек

Қылмыстық істер жөніндегі сот алқасының төрағасы Н.Рахметуллина өз сөзінде заңнамаға енгізілген өзгерістерге (ҚК-нің 6-бабы) байланысты 87% материал (1279) қанағаттандырылып, сотталғандар жазасы жеңілдетілгенін, бұл түзеу мекемелеріндегі орындарды

босатуға елеулі ықпал еткенін атап өтті. Үш ай ішінде қылмыстық істер саны 8,5%-ға артқан (8 795-тен 8 962-ге дейін).

I тоқсанда апелляциялық сотпен 453 үкім түзетілді (5,1%), ал 2024 жылдың осы кезеңінде 340 үкім (4,3%) өзгертілген және күшін жойған. Кассациялық сотпен 48 адамға қатысты (барлығы 81 сот актісі) апелляциялық актілер өзгертіліп, күшін жойған, 11 іс 22 адамға қатысты қайта қарауға жіберілген. Тергеу соттары қамауға алуға санкция беруді сирек қолдана бастады. Биылғы көрсеткіш 65,8% болса, өткен жылы 87% болған.

Баяндамашы соттардың процестік қатысушылар шағымын объективті қарауға, дәлелдемелердің заңға сәйкестігіне принципті баға беруге назар аударуы қажет екенін атап өтті. Адамның кінәлілігі туралы шешім барлық заң талаптарын сақтай отырып жиналған жет-



кілікті дәлелдер жиынтығына негізделуі тиіс.

Бостандықтан айыруға баламалы электрондық білезіктермен ұйқамақ, қоғамдық жұмыстар мен айыппұлдар секілді бұлтартпау шарасы мен жазаны кеңінен қолдану ұсыны-

лады. Сондай-ақ, шартты-мерзімінен бұрын босату (ШМБ) және жазаның өтелмеген бөлігін жеңіл жаза түріне ауыстыру (ЖЖА) кезінде заң талаптарын қатаң сақтау қажет.

(Жалғасы 2-бетте)

